

Entrante 1 di juli tarifa di BAZV lo bira 3%

ORANJESTAD - Entrante 1 di juli venidero, lo tin cambio den tarifa di BAZV cual lo ta na 3%. Esaki ta locual Departamento di Impuesto a informa den un comunicado.

Kende tin cu paga BAZV?

E empresario ta e suheto, pues e ta esun cu tin cu paga BAZV na Departamento di Impuesto. Un di e cambionan di ley ta encera ampliacion di e concepto di empresario. Pa ley e empresario ta tur esunnan cu ta eherce un profesion of empresa independientemente como tambe tur esunnan cu ta haci negoshi cu bienes/capital pa saca ganashi permanentemente.

Riba kico ta cobra BAZV?

E base pa cobra BAZV no a cambia. Ta cobra BAZV riba e volumen di benta di empresa (bedrijfsomzet). Esaki ta e suma bruto cu e empresario ta ricibi di su clientenan na momento cu e bende un producto of servicio. Ora ta papia di e volumen di benta di empresa ta mantene en principio e sistema di cash. Esaki ta nifica cu e debe di BAZV ta surgi na momento cu e empresario ricibi pago (compensacion) pa e producto of

servicio cu el a bende.

Cua ta e tarifa di BAZV entrante 1 di juli 2018?

Entrante 1 di juli 2018 e tarifa di BAZV ta cambia y ta bira 3%. Pues e empresario ta paga 3% na BAZV di e suma ricibi di su di benta di producto of servicio. Calculacion di BAZV Aki ta sigui un ehempel con pa calcula e BAZV: Suma ricibi di benta di producto of servicio Afl. 100,--

E BAZV cu e comerciante mester paga ta Afl. 3,00 (3% di 100,00). E ta paga e suma aki na Departamento di Impuesto. Si e comerciante a cobra su cliente Afl. 103,00 e ora e tin cu paga Afl. 3,09 na BAZV (3% di 103,00). Haci declaracion di BAZV E empresario ta haci declaracion y pago di BAZV riba un base mensual y no mas laat cu dia 15 di cada luna.

Den esaki no a bin cambio. E prome declaracion basa riba e tarifa di 3% ta regarda e luna di juli 2018 y mester entrega e declaracion y haci e pago correspondiente no mas laat cu dia 15 di augustus 2018. Formulario di declaracion Pa e periodo di juli te cu de-



cember 2018, Departamento di Impuesto ta pidi tur empresario pa declara BAZV riba e mesun formulario di BBO/BAZV cu nan a ricibi na comienso di aña. Pues e empresarionan no lo ricibi un formulario di declaracion nobo. Ta intencion pa adapta e formulario di declaracion

pa aña fiscal 2019. Comerciante mester menciona e suma di BAZV riba e recibo. E ley di BAZV ta impone cu e comerciante mester menciona e suma di BAZV riba su recibo. Cu e stipulacion aki mester compronde cu no ta necesario pa pone BAZV den forma di un calculacion riba e

recibo. Simplemente mester menciona cua ta e suma cu ta regarda BAZV. E idea tras di e stipulacion aki ta pa e cliente por mira cuanto BAZV e comerciante tin cu paga na Departamento di Impuesto (transparencia).